

EH Bildu talde politikoa

Grupo político EH Bildu

Ijentea, 1 - 20003 Donostia
Tel. 943481027 eh_bildu@donostia.eus-- www.donostia.ehbildu.eus -

KONTROL MOZIOA

COVID-19ak kultur esparruan izan duen eraginari buruzkoa

Zigor Etxeburua Urbizuk, EH Bildu udal taldeko zinegotziak, Udalbatzaren Organo Araudiko 98. artikulua oinarri, mozio hau aurkezten du, Udalbatzan azter dadin. Mozioa 2020ko maiatzaren 11n Pertsonentzako Zerbitzuen Batzordean aztertutako interpelazioaren ondorioa da.

JUSTIFIKAZIOA

Gure hiriak kultur bizitza zabala du, sortzaile ugari ditu eta, modu batean edo bestean, kulturaren parte hartu edota berarekin gozaten dugu herritar gehienok. Orain, Covid19ak eragindako osasun krisiak eraginda, gure sortzaileak kinka larrian geratu dira, babesgabe: hitzartuta zituzten emanaldiak bertan behera geratu dira, argitaratu asmo zituzten lanak ezin plazaratu daude, iturri ekonomikoen emaria etenda... Covid19ak sektore hori amildegi ertzean ipini du. Euskal kulturgintzaren prekaritatea egiturazko arazoa da, baina Covid19ak eragindako pandemiak arazoa izugarri larriagotu du. Egoera hori are zailagoa da euskaraz sortzen duten kulturgileentzat, gure ekosistema zaugarria baita lehendik ere.

Covid19ak eragindako krisiaren lehen unetik, Donostiako EH Bilduren udal taldea harremanetan jarri zen Udal Gobernuarekin, kulturaren esparruan aurreikusten genuen egoera arazotsuari aurrea hartzeko. Martxoaren 20an bidalitako mezuan, kezka adierazi genion DKko langileen egoeraren inguruan (behin behinekoak bereziki), galdetu genion harremanik izan ote zuen hiriko kultur eragileekin beraien egoeraz jakiteko, itaundu genion zer asmo zuten programatuta edota hitzartuta egonik bertan behera geratutako emanaldi eta egitasmoekin, eta eskatu genion, kulturako aurrekontuan aldaketarik egin behar izatekotan, Donostia Kultura erakundeko Administrazio Kontseiluari eskatzeko irizpide batzuk, erabakiak adostuak izateko, ahal zen heinean. Aipatu galderei erantzunez, martxoaren 23an, uneko egoerari erantzuteko asmo batzuk aurreratu zizkion zinegotzi arduradunak udal talde honi. Informazio hori ematea eskertzeaz batera, berriz adierazi genion gure taldea laguntzeko prest zegoela.

Ordutik bi hilabete igaro dira, eta Udal Gobernuak galdera batzuk erantzun baditu ere, eta Donostia Kulturak egindakoez zenbait berri eman dizkigun arren, ez du hiriko kultur bizitzak pairatu duen eraginaren inguruko azterketarik partekatu udal taldeekin, ez du aurreratu nondik nora joango den kultur esparrua laguntzeko eta sustatzeko jorratu nahi duen bidea, ezta udal taldeoi horren inguruko iritzirik eskatu ere. Bitartean, kultur esparruko eragileek alarma deia jo dute, bai RESET plataforman bildu zirenek, baita apirilaren 21 eta 22rako greba digitala deitu zuten eragileek ere.

Horiek horrela, igaro den maiatzaren 11ko batzordean, Kulturako zinegotziari galdetu genion zergatik Udal Gobernuak ez zuen partekatu egoeraren inguruko azterketarik, udal taldeekin, osasun krisiko tarte horretan. Zinegotziaren esanetan, aski informazio eman zien udal taldeei, garaian egindako galderei erantzun zielako jada, eta DKko eta Musika Eskolako zuzendariak informazioa bidali zigutelako tarteka, erakunde horietako administrazio kontseiluetako kide garenok. Hona hemen

EH Bildu talde politikoa

Grupo político EH Bildu

Ijentea, 1 - 20003 Donostia
Tel. 943481027 eh_bildu@donostia.eus-- www.donostia.ehbildu.eus -

informazio hori (soilik DK erakundeak helarazitako informazioa ekarriko dugu, hori baita mozio honen funtsa):

- Mar 23
 - **Info:** etxetik lanean, datuak; programazioa etenda (GIZA ESKUBIDEEN jaialdia bertan behera; ekitaldi gehienak udazken-negura pasatzeko erabakia; Mojo Workin egoera); Liburutegiak, datuak; ON LINE eskaintza abiatzeko asmoa; kultur zerbitzuei eta sortzaileei eusteko asmoa.
- Mar 27
 - **Info:** DK ETXEAN programazioa abian jartzeko erabakia, eta programazioaren nolakoa.
- Api 17
 - **Info:** Zertan ari den DK: Telelana, datuak; DK Etxean (maiatzaren 10era arte luzatzeko erabakia; audientziak; ordainketak; info laburra ikastaroak online emateaz, lanera itzultzeko prestaketak egiteaz eta DKren eskaintza zabaltzeko eskenatokiak marratzen aritzeaz.
- Api 24
 - **Info:** Langileen prestakuntza, datuak.
- Api 29
 - **Info:** Ordu batzuk lehenago alkateak hiriko kultur eragile batzuekin egindako bileraren berri ematea, eta aurretik hartuta zituen zenbait erabaki ezagutaraztea. Era berean, programazioa nola landu, antzokiak noiz ireki eta abar aurrerago jakinarazteko asmoa azaltzea. Azkenik, aurreratzea Jazzaldiaren edizio berezia egitea erabaki den moduan gauza bera egingo dela Musika Hamabostaldia eta Zinemaldiarekin ere.
- Mai 7
 - **Info:** ANTZOKIA ETXEAN ekimenaren amaieraren, nolakoa.
- Mai 12
 - **Info:** DK ETXEAN ekimenaren balantzea.
 - **Galdera:** administrazio kontseilua egiteko eguna.
- Mai 14
 - **Info:** administrazio kontseilua egiteko eguna.

Zerrendatutako mezuen edukietan ikusten denez, eposta guztiak informatiboak izan dira, ez da iritzirik eskatu, ez bada Administrazio Kontseiluaren bileraren data noiz egin zehazteko. Kontseiluko kideei informazioa eman zaigu; ez, ordea, iritzia eskatu.

Era berean, galdetu genion Kulturako zinegotziari zergatik Udal Gobernuak ez digun aurreratu, udal taldeoi, nondik nora joango den jorratu nahi duen bidea, kultur esparrua laguntzeko eta sustatzeko. Zinegotzi arduradunak erantzun zuen egoera zaila izan dela estrategiak markatzeko, eta iskin egin

EH Bildu talde politikoa

Grupo político EH Bildu

Ijentea, 1 - 20003 Donostia
Tel. 943481027 eh_bildu@donostia.eus-- www.donostia.ehbildu.eus -

nahi izan zion galderari, berriro gogoratuta DKko Administrazio Kontseiluko kideoi bidalitako informazioa.

Azkenik, galdetu genion zergatik Udal Gobernuak ez dien iritzirik eskatu udal taldeei, kultur esparrua pairatzen ari den egoera hain larria dela jakinik. Zinegotziak gure taldeari leporatu nahi izan zion garaian iritzia eman ez izana. Horren aurrean, oroitarazi genion EH Bildu taldeak Udalbatzaren erregistroan sartu zuela, apirilaren 24an, kultur bizitza berrartzeko eta indartzeko ekintza plan bat, eta alkateak berak aitortu ziola gure bozeramaileari hainbat neurriekin bat zetorrela.

EH Bildu udal taldeak azpimarratu nahi du gogoeta partekatu baten beharra dagoela Covid-19aren krisiak hiriko kultur bizitzan eragin duen kalteen eta utzi duen egoeraren inguruan, eta beharrezkoa dela kultur bizitza berrartzea eta indartzea helburu izango duen ekintza plan bat adostea guztion artean. Tamalez, krisi egoera hau luzatu egingo da, eta gogoan izan behar dugu kultur arloa izan dela lehenengoetako kaltetua, eta egoera honetatik ateratzen azkenetakoa izango dela. Horregatik, ez da pertsonalismoan aritzeko edo protagonismoa bilatzeko garaia, denok batera aritzekoa baizik.

Horiek horrela, honako hau da behean sinatzen duen zinegotziak aurkeztutako **KONTROL MOZIOA**:

KONTROL MOZIOA:

1.- Udalbatzak hertsatuki eskatzen dio Udal Gobernuari eratu dezala kultur mahai bat hiriko kultur eragileekin (profesionalak eta irabazi asmorik gabekoak) eta udal taldeon ordezkariekin, gogoeta prozesu bat abiatzeko, Covid-19aren krisiak hiriko kultur bizitzan eragin dituen kalteen eta utzi duen egoeraren inguruan, eta kultur bizitza berrartzea eta indartzea helburu izango duen ekintza plan bat adosteko.

Donostia, 2020ko maiatzaren 18an

Zigor Etxeburua Urbizu
EH Bildu udal taldeko zinegotzia